

RAMTHAR RAWNGBAWLNA

Ramthar Ni hmanthu zawng zawng chibai kan buk a che u. Kan hriat tlan angin kum tin August ni 31 hi Ramthar Ni pualin hman a ni thin a, kuminah pawh Ramthar Ni kan lo thleng leh ta a. Kohhranhoten ramthar rawngbawlina lama kan zavaia thawh hona chanchin kan hriat thar leh theih nan, rawngbawlina chanchin tlangpui kan inhriattir thar leh dawn a ni. Mizoram Presbyterian Kohhrana Chanchin Tha hril lam thawktu chu Synod Mission Board (SMB) Department a ni a, kum 1961-ah board puitlingah siam a ni. Thil tihhlawhtlin tum fel tak a nei a, chungte chu:

1. Lal Isua chanchin la hre lote hnena Chanchin Tha hril.
2. Ringtharte chawikan leh tihchak.
3. Kohhrante chu mahni intodelh, mahnia inrelbawl thei leh Chanchin Tha hril thei tura buatsaih.
4. Kohhran leh pawl dang nena thawh ho.

Mizoram Presbyterian Kohhran hian la hre lote hnena Chanchin Tha hril hi a ngai pawimawhin, hna pui berah a neih a tih theih awm e. Kum 1910-ah Mizo tlangval pathum chuan Senvawn (Manipur)-ah Chanchin Tha hril an lo tan daih tawh a, wawin thleng hian missionary 1,700 chuangin he rawngbawl hna ropui tak hi an chhonzawm mup mup reng a ni.

Tunah hian Mission Field 16 kan nei mek a, chungte chu (*alphabet indawtin, hawn kum nen*):

1. Arunachal & Assam East (1991)
2. Arunachal & Assam West (2001)
3. Assam (2008)
4. Barak Area (1975)
5. Delhi (1988)
6. Jharkhand (2008)
7. Karbi Anglong (1989)
8. Kolkata (1988)
9. Lucknow (1999)
10. Manipur (1967)
11. Nepal (2000)
12. Patna (1999)
13. Siliguri (1988)
14. Tripura (1986)
15. Home Mission North (1949)
16. Home Mission South (1987)

Heng bakah hian Mizoram chhunga hnam dangte (Non-Mizo) zingah rawngbawlina chak takin kalpui reng a ni baw a. Presbyterian Hindi Bible School, Mission Development Training Centre (MDTC) leh Missionary Training College (MTC)-ah pawh rawngbawlina kalpui reng a ni baw.

Heng Field tinah hian missionary-ten thahnemngai takin ni tin kawng hrang hrangin Chanchin Tha hril hna an thawk reng a, an rawngbawlina chu Pathianin mal a sawm a, kum tin ringthar thahnem tak min pe zel a ni.

I. RAWNGBAWL DAN TLANGPUI

Rawngbawlina hi kawng hrang hrangin kalpui a ni a, a chipchiara sawi sen a nih loh avangin a tlangpui chauh han sawi ila:

1. Direct Evangelism : Ringlote hnena Isua Krista Chanchin Tha hrilh hriat ngei tumin beihpui (camping, campaign, crusade, rally, etc.) neih thin a ni a; heng bakah Bible tract sem, in tlawh, naupangte hui khawma Isua chanchin hrilhthe hi thawh dan ki pui deuh deuh chu a ni.

2. Indirect Evangelism : He rawngbawl dan ki pui deuhte chu sikul leh zirna dang hawn te, tihdamna lam hna te a ni ber. Puitling ziaak leh chhiar thiam tawhte hnenah English hman zirtir thin a ni baw a, hei hi ringtharte sawhnghehna leh tichakna hmanraw tha tak a ni.

1) Sikul hmanga rawngbawlina : Synod Mission School-te hi an chhuanawmin, an awmna State-ah pawh lang tham leh mite bawh ber a ni zel a; chuvangin, Chanchin Tha hrilna remchang tak a ni. Zirlaite, Pathian biakna hun hmanpui te, Gospel Hapta hman te, crusade buatsaih te, chhuahvah leh in tlawh te tih thin a ni a. Tunah hian sikul 52 (H/S 10, M/S 15, P/S 27) chuang kan nei mek a ni.

2) Zirna dang : Field hrang hrangah Training Centre 17 hawn a ni a, hei hi rawngbawlina leh Chanchin Tha hrilna kawngah hmanraw tangkai tak a ni. Hengahte hian kohhran leh a rawngbawlina lam thil bakah eizawna leh khawsakna lama an dinhmun chawikanna kut themthiamna thlengin zirtir a ni a; ringtu leh ringlo thahnem takin an zir thin avangin, hei hi ringtu tihchakna leh ringlote hnena rawngbawlina hmanraw tha tak a ni. Ringtharte tihchak nan leh Bible hriatna kawngah hman an sawn theih nan Bible Ralchhan buatsaih thin a ni baw.

Missionary Training Centre, Mission Vengthlanga mi chu kumin (June 4) atang khan Degree College-ah hlan kai a ni ta baw a. A hawnna inkhawm pawh ropui takin hman a ni.

...*Phêk hnihna, Editorial hnuaiah zawm a ni*



Editorial Staff

Rev. Thangzauva Upa H. Ronghaka
Rev. B. Lalngkhakliana
Upa C.H. Thangkhuma

Pathianin a mamawh leh a phût chu mi tak, a laka rinawm leh dik taka thil ti thinte hi an ni a; chutih laiin Setana chuan Pathian ringtute hi thatchhe taka thil tia, a dera nunga, mi hmuh leh hriat chauhva tha anga lang turin a thlem thin. Setana buma kan awm loh nan Pathian leh kan mihringpuite lakah pawh rinawm ila, a dik leh a tha chauh tih i tum tlat zel ang u.

...Phêk khatnaa mi chhunzawmna

3) **Medical Ministry** : Lal Isua hnathawh chhunzawmin tihdam rawngbawl hna hi kohhranin a dah pawimawh hle a, taksa damna duha pantute hnena Chanchin Tha hrilhna remchang tak a nih avangin rawngbawlna tângkai ber zinga mi a ni a; tunah hian he lama thawktu leh thawhna hmun (Medical centre) hi 70 dawn lai kalpui a ni.

II. THAWKTU LAM

Rawngbawl hmun leh rawngbawl dan a zau zel angin thawktu pawh kum tin kan pung zel a. Ramtharah thawktu thahnem tak kan awm ve ta hi a lawmawmin, kan rawngbawlnain hma a sawn zel tih tilangtu tha tak a ni. Tun dinhmuna thawktu awm zat chu hetiang hi a ni:

1. Missionary (SMB hnuai)-a thawk	-	605
2. Field Worker (A ram mi thawktu)	-	621
3. Contract/Short Term Missionary	-	485
4. Hqrs. Office, Trainees, etc.	-	47
Total	-	1,758

III. KOHHRAN LAM

Mission Field-a kan rawngbawl hna hi kohhran din, phun leh kohhran enkawl tura a ram mi chher kawngah a hlawhtling hlein a hriat a; kan dinhmun tlangpui pawh hetiang hian a khai khawm theih ang:

1. Pastor Bial zat	- 92	2. Kohhran zat	- 341
3. Preaching Station	- 411	4. Fellowship zat	- 312
5. Kohhran Upa	- 505	6. Presbytery zat	- 5
7. Kohhran member	- 81,768		

IV. RINGTHAR DINHMUN

Missionary-ten thahnemngai taka Chanchin Tha hril hna an thawh hi Pathianin a hmu reng a, ringthar tam takin mal min sawm lêt thin a ni. Kum nga kal ta chhunga ringthar kan neih dan chu hetiang hi a ni:

Kum 2004-ah 5,196	Kum 2005-ah 6,072
Kum 2006-ah 5,533	Kum 2007-ah 5,850
Kum 2008-ah 5,672	Kum 2009-ah 9,031
Kum 2010-ah 3,629 (June thleng)	

...lehlamah zawm leh a ni ↗

V. MISSION DANG NENA THAWH HONA

Thawktu leh sum leh pai indaih tawk lohna avangin rawngbawl hmun zauh zel a har thin a, mahni ke chauh hmanga rawngbawl harsatna hmun pawh a awm thin. Chuvangin, mission pawl dang nen thawk hovin, hmun hrang hrangah kawng hrang hrangin rawng kan bawl ho va; hei hi a sawtin a zawngchhang tlak hlein a lang. Tunah hian mission pawl dang 14 nen thawk hovin, thawktu 50 chuang kan tir mek a ni. Kan thawhpui pawl te chu hengte hi an ni:

1. Emmanuel Hospital Association, Delhi (1980)
2. Interserve (India) (1985)
3. Friends Missionary Prayer Band (1988)
4. CONCERN (1988)
5. Evangelical Presbyterian Church, Sikkim (1988)
6. India Missions Association (2000)
7. Presbyterian Church USA
8. YWAM NE (2004)
9. Christian Reformed World Mission (2005)
10. Operation Mobilization (2005)
11. Church Mission Society (2006)
12. Seva Bharat (2008)
13. New Enterprises International (2008)
14. SIMNEI (2008)
15. Council for World Mission (1986) (*PCI kaltlangin*)

VI. APRIL 2009 – MARCH 2010 RAMTHAR SUM DINHMUN

Budget	-	Rs. 22,37,94,000
Hmuh zawng zawng	-	Rs. 27,04,05,084
Budget khumna	-	Rs. 4,66,10,584
<i>Nikum khumna</i>	-	Rs. 4,82,46,234

VII. MISSIONARY CHAWM

Kohhran thahnemngaiten missionary pakhat Rs. 1,000/- hisapin an chawm a, tun dinhmuna missionary chawm dinhmun chu hetiang hi a ni:

1. Missionary chawm zat	-	8,348
2. Chawmtu kohhran zat	-	520
3. Chawmtu Bial KṚP zat	-	109
4. Chawmtu Bial Kohhran Hmeichhe zat	-	110
5. Chawmtu Bial zat	-	64

VIII. THIL DANG

1. Kumin June 4 aṅang khan MTC chu degree college-ah hlan a ni ta a, tunah hian mi 15-in B.Miss. an zir mek.
2. Contract Missionary-ten hamthatna an hmuh theih nan LIC policy zawmsak turin hma lak mek a ni.

Ramthar rawngbawl hna hi chipchiara sawi sen a ni lo. Kohhranho leh missionary-te thahnemngaihna avangin kan kohhran ramthar rawngbawlnaah hian ni tin hmasawmna thar hmuh tur a awm a, hnehna kan chang zel a ni tih hriain, he rawngbawl hna leh a hnaah hian tawngtaina nasa tak nen thahnemngai takin i thawk zel ang u. — *Synod Mission Board*



Mipui zing ata mi pakhat hi lo pen chhuakin, “Râl Vêngtu, Zion Khawpui tihchhiat tumte chet dan min hrilh ta che, kan lo invenna tur leh, chu khawpuia chengte tan inralrinna thu kan lo puan theih nan,” a ti a. Râl Vêngtu chuan, “Tum khata han sawi zawh mai chi ni lo mah se, henge hi lo hre phawt rawh u,” a ti a.

1. Isua Krista aia pawm zau te; pawm zim te; Chhandamtu ni awm taka, chhandam tur leh tur loh lo thliara; Isua hauh bik te; mi dang er ran mai - mi dang sawichhiat hi Chanchin | ha em maw tia Chanchin | ha dang hriltute leh, an pawl sawi dan chauh Pathian thutaka ngaite hi hria ula, chhinchhiah rawh u.

2. Mizoram ramri pel lo Pathian thu tlangaupuia, Zoram chh<nga ‘kum sang rorel’ lo tum ta mai te, remna leh muanna Chanchin | ha tlangaupui tak aruanga hlauhna thu kengtu, hlauh tur hre em em mai te an pung zel a, “Khawngaihna hun a tawp tawh. Pathian rin a s^wt tawh lo,” ti te pawh an lo chhuak mek a ni.

3. Zion khawpui hmangaihtu der, a chhunga awma thingnet pangang ang mai a hna thawkte hi veng \ha ula, a \ul dan azirin chaldelh taka thu hrilh pawh tîm hauh suh u.

SYNOD CHHAWMDAWLNA

Mizoram Presbyterian Kohhran Synod chuan tun hnaia leimin avanga in leh lo chante leh thihna tawh chhungte hnenah chhawmdawlina (Synod Relief Fund) sum a pe. Thihna tawh chhungte hnenah Rs. 10,000/- pek a ni a, in leh lo chante hnenah Rs. 4,000/- te, Rs. 5,000/- tein chhawmdawlina hlan a ni bawk. Hetiang hian mi paruk hnenah a vaiin Rs. 38,000/- pek a ni.

CAMPING CENTRE A RAK

Synod Revival Camping Centre, Sihphir Neihbawia mi chu hawn a nih aţangin âwl lai awm meuh lo khawpin kohhranin camping buatsaih nan an hmang a. August thla thleng hian kohhran 15-in an hmang tawh a; kumin November thla chawhma lam thleng hian camping buatsaih nan kohhranin an hauh lawk tawh a ni.

He Centre-ah hian Synod Revival Department ngenna chhangin July thla khan a hmun sam faiin Lungdai Bial K. T. P. an hnatlang a, mi 150 vel an thawk chhuak. August thla bul lam khan Sihphir Bial K. T. P. an hnatlang leh bawk.

PRESBYTERIAN HOSPITAL, DURTLANG JULY, 2010 CHHUNGA THILPEK DAWNTE

I. Charity Fund

1. Keiţum Pastor Bial, Keiţum	Rs. 10,000.00
2. Life Drug Centre, Upper Bazar	Rs. 20,000.00
3. KTP, Khawlailung Bial	Rs. 5,000.00
4. Saitual Bial Kohhran Hmeichhia	Rs. 3,000.00
5. Sakawrtuichhun Presbyterian Kohhran	Rs. 3,000.00
6. Upa A. Rangkhuma, Luangmual W	Rs. 2,000.00
7. Pu V. Hmingliana, Nursery Veng	Rs. 1,000.00
8. KTP, Kelkang Bial	Rs. 2,000.00
9. Ramhlun South Pastor Bial	Rs. 10,000.00
Total	Rs.56,000.00

II. Thisen pek/dawn

	Unit	pek zat
1. KTP, Chaltlang South Branch	42	Units
2. KTP, Tlangnuam Vengthar Branch	37	Units
3. NSS Unit, Synod HSS	116	Units
4. Public Higher Secondary School	61	Units
5. YMA, Nursery Veng Branch	101	Units
6. Vohbik Thalai, Aizawl (Nunna Lal Hnam)	8	Units
Total	365	Units

III.

1. Selesih Kohhran Hmeichhia Swabstick 2,090
Thilpek min petute zawng zawng chungah Pathian hmingin lawm thu kan sawi takmeuh a ni.

Sd/-
(REV. C. LALBIAKHLUNA)
Chaplain
Presbyterian Hospital

ATC-AH B.D. PASS THAR 39 LEH PROGRAMME THAR

Mizoram Presbyterian Kohhran hnuiaia Theological Education Board-in a enkawl, Aizawl Theological College-a Bachelor of Divinity (BD) zirlai 39 chuan an vaiin tha takin an pass. An mark hmuh san dan ang zelin grade pek an ni a, Grade B+ 4, Grade B 24, Grade B- 8 leh Grade C 3 an awm. Aizawl Theological College hi Senate of Serampore University hnuiaia college changtlung leh chhuanawm ber pawl a ni tawh a; Pathian thu zirna pangngai bakah zirna dang pawh nung taka kalpui zel a ni.

Tun thla tirah khan Council for World Mission (CWM) pawhin ATC hi an programme pawimawh tak, kum tina ram hrang hranga mite inzir tawna course an buatsaih thin, ‘Face to Face’ programme tihna hmun atan an rawn en thlithlai a, London aţangin an Secretary pakhat a lo kal a ni. He programme hi Aizawl Theological College-a nghah a nih chuan kum tin ram hrang hrang sawm vel aţangin thalaite an lo kal ang a, thla li vel Pathian thu leh kohhran kalhmang zirin an awm thin dawn a ni.



Champhai Hmunhmeltha Kohhran chuan May 17–June 9, 2010 chhung khan Jeriko Operation Gospel Team ruaiin camping chhawng thum an buatsaih a, camper 345 lutin Thlarau Thianghlim pawl tharna an chang. Pavalai Pawl din thar a ni bawk a; he camping hian rah duhawm tak a chhuah zel.

Nghalchawm Kohhran (Sairang Bial) pawhin July 10–21, 2010 chhung khan Pi P.C. Vanlalnglaki (Jehova Jire Team) ruaiin camping chhawng hnih an buatsaih a, camper 115 an lut. Kohhran boruak a nuam hle a; kohhranin Pathian hnena lawm thu sawina ruai an buatsaih a, hlim takin tisa leh thlarau lam ruai an kil ho. Camping hnu hian UPC (Mz) in khat chu Presbyterian Kohhranah an lut nghe nghe.

Lungkawlh Kohhran chuan July 12–20, 2010 chhung khan Pu C. Ramtharnghaka (Jehova Jire Team) ruaiin crusade an buatsaih a; inkhawm ngai tawh lote leh kohhran pawl dang mi eng emaw zatin Pathian thu an dawng a; kohhranin an hlawkpui hle.

SAWMNA

Mualcheng Presbyterian Kohhran chuan September 18, 2010 (Inrinni) hian an biak in hawn an tum a. He ni hmanpui tur hian Mualcheng Kohhrana lo lawi tawh zawng zawngte an sawm.

FILM THEH LUH HUN SAWN

Family Guidance & Counselling Centre-in Kristian Chhungkaw Film Competition a butsaia film theh luh hun tura tih, September 30, 2010 chu ngenna a nasat avangin November 30, 2010-ah sawn hlat a ni a; result puan hun tur erawh chu la inhriattir leh a ni ang. Film inchansiaknaa tel tumte chuan October thla ral hmain Director, FC&CC hnenah tel an tum thu hriattir turin kan ngen e.


 (REV. ZOTHANSANGA)
 Director
 FG&CC, Synod Office, Aizawl

MUSIC ADMISSION

Synod Music School-a thla thum chhung zir tura buatsaih Tonic Solfa leh Staff Notation zir duh tan admission hawn a ni a, zir duh chuan Synod Office, Music Department-ah office hun chhunga dilna form lain August 24, 2010 thleng dilna theh luh theih a ni. Admission fee Rs. 50/- leh tuition fee thla khat atan Rs. 150/- zel (A vaiin Rs. 500/-) a ni. Class kal hun chu Thawhtanni atanga Zirtawpni zing dar 6:30–7:00 a ni a, September 1, 2010-ah class tan tur a ni ang. Hre chiang duh tan Synod Office Music Department phone 2326372/2322285 EPABX (O)-ah zawh theih a ni.

SYNOD REVIVAL TEAM INTUAITHARNA

Mizoram Presbyterian Kohhran Synod hnuaiia kohhran tihharh zelna lam ngaihtuatu, Synod Revival Committee buatsaihin July 23–25, 2010 chhung khan Chanmari Kohhran, Aizawlah Revival Team Retreat 2010 hman a ni a. Hetah hian Synod Revival Speaker-te leh an team member dang paruk zel, a hmuna riahchilha kal tura beisei an ni. A hmunhma zawh dan tawh thlirin Kohhran Hall-ah mi 280 vel an riak lut a; hming ziaktuten retreat-a kal, Revival Committee member leh team member an chhinchhiah zawng zawng chu 485 an ni.

July 24 (Inrinni) nilengin **'Speaker-te mamawh'** tih thupui zir ho a ni a. Thupui hi Rev. K. Lalthangmawia leh Upa C. Ngurthantluanga-ten an sawi hawng phawt a, sawi hona tha takin a zui a ni. He hunah hian Synod Revival Speaker 70 an kal kim vek a, team member-te pawh an kal tha hle. Hemi ni bak inkhawm dang zawng chu, Zirtawp zan atanga Pathianni zan thlengin vantlang inkhawmin hman a ni a; Pathianni chawhma inkhawmah retreat thupui, **'Thianghlimna'** tih chu Rev. Vanlalzuata, Sr. Executive Secretary i/c Revival-in a sawi. Rev. R. Lalchangliana, Director, Synod Revival-in zan hmasa berah report leh thuchah tawi a sawi a, hun dangah Synod Revival Committee member – Rev. C. Lalchanliana te, Rev. H. Lalchhanhima te leh Synod Moderator Rev. C. Chawngliana-ten thuchah ropui tak tak an sawi bawk.

Kumin Retreat hi kum dang aiin ni khatin a hun tihtawi a ni a; chuwangin, thusawituten thahnem an ngai em em a, a kalten hlawkpui hlein an inhria. Zai a nuam a, chu bakah mal zai, group zai leh kohhran leh Bial Zaipawl zai tura sawmtan an chanvo an tihlawhtling thei vek a. Office lamin an ngen leh beisei angin cable TV local channel – Zonet leh LPS-ten inkhawm hi a tir zan atangin mipui en theih turin an tichhuak thei reng bawk a, in lam atanga lo thlirtu eng emaw zat an awm theih phah a ni.

Retreat thlengtu Chanmari Kohhran hian kumin May thla tawp lam khan Zoram pum huap Pavalai Meet hautak zet mai an lo thleng tawh a; chuti chungin inhawng tak leh zo takin, inthlahrunna tur awm miah lovin Synod Revival Team Retreat hi an thleng leh thei a, an fakawm hle. Retreat atan hian kohhranin budget Rs. 2,68,000/- lai siamin, ei leh in tur tuihnai tak tak chhawpin ruai pawh vawi thum lai an buatsaih nghe nghe a ni.

Retreat buatsaihtu Synod Revival Committee chuan retreat hlawhtling tak hman a nih theih nana sum leh pai, tha leh zung sengtute chungah te, chanvo nei zawng zawng leh retreat hlawhtlin theih nana tawngtaia tan latu zawng zawng chungah lawm thu a sawi a ni.

Thu lakna : Synfocity & Rev. R. Lalchangliana, Director, Synod Revival.